



საქართველოს მთავრობის განკარგულება

№1033 2018 წლის 10 მაისი ქ. თბილისი

საქართველოს სამოქალაქო აეროპორტებში მგზავრთა გადაყვანისა და ტურიზმის ხელშეწყობის მიზნით ავიარების ორგანიზებისათვის განსახორციელებელი ღონისძიებების შესახებ

1. „საქართველოს მთავრობის სტრუქტურის, უფლებამოსილებისა და საქმიანობის წესის შესახებ“ საქართველოს კანონის მე-5 მუხლის „ი“ ქვეპუნქტის შესაბამისად, საქართველოს სამოქალაქო აეროპორტებში მგზავრთა საჰაერო ტრანსპორტით გადაყვანის ორგანიზების უზრუნველსაყოფად, ასევე ქვეყანაში ტურიზმის ხელშეწყობის მიზნით, ეთხოვოს შპს „საქართველოს აეროპორტების გაერთიანებას“ (ს/კ: 404389693) განახორციელოს საჰაერო ტრანსპორტით მომსახურების შესყიდვა ელექტრონული ტენდერის საშუალებით.

2. მომსახურების შესყიდვა უნდა განხორციელდეს ამ განკარგულების მოთხოვნების შესაბამისად, ჯამური სახელშეკრულებო ღირებულებით არა უმეტეს 20,253,176.67 აშშ დოლარის ეკვივალენტით საქართველოს ეროვნულ ვალუტაში.

3. მომსახურების შესყიდვა უნდა განხორციელდეს შემდეგი

ძირითადი პირობების დაცვით:

ა) მომსახურების არსი – შპს „საქართველოს აეროპორტების გაერთიანების“ მიერ განსაზღვრულ მიმართულებებზე მის მიერვე დადგენილი გრაფიკითა და პირობებით მგზავრთა საჰაერო ტრანსპორტით გადაყვანის მომსახურება;

ბ) მომსახურების ღირებულება – მომსახურების ღირებულება ანაზღაურდეს ყოველთვიურად, ფაქტობრივად შესრულებული რეისების მოცულობის მიხედვით და შესაბამისი მიმართულებების გათვალისწინებით, ხელშეკრულებით დადგენილ ფასად. მიმწოდებლის მხრიდან მოთხოვნის არსებობის შემთხვევაში, შესაძლებელია, განხორციელდეს წინასწარი ანგარიშსწორება ყოველთვიურად, ყოველი საანგარიშო თვის გეგმა-გრაფიკის გათვალისწინებით საანგარიშო თვეში მოსალოდნელი მომსახურების ღირებულების ჯამური ოდენობის არა უმეტეს 50%-ისა. წინასწარი ანგარიშსწორებისთვის აუცილებელია წარდგენილ იქნეს საავანსო საბანკო გარანტია არანაკლებ ავანსად გადასახდელი თანხის ეკვივალენტურ ოდენობაზე, კანონმდებლობით დადგენილი წესით;

გ) საჰაერო ხომალდის ტიპი

მომსახურების გაწევა უნდა განხორციელდეს:

- ერთი მცირე ზომის (არანაკლებ 15-ადგილიანი) საჰაერო ხომალდით;
- ერთი საშუალო ზომის (არანაკლებ 30-ადგილიანი) საჰაერო ხომალდით, მხოლოდ თბილისი-ბათუმი-თბილისის მიმართულებისთვის.

თითოეული საჰაერო ხომალდი უნდა შეესაბამებოდეს საქართველოს ტერიტორიაზე მოქმედ აეროპორტების საექსპლუატაციო პირობებს ნებისმიერ საფრენოსნო სეზონზე/წლის ნებისმიერ დროს.

საჰაერო ხომალდების მობილიზაციისთვის და მომსახურების გაწევის დაწყებისთვის მიმწოდებელს უნდა მიეცეს არა უმეტეს 3-თვიანი ვადა ხელშეკრულების გაფორმების თარიღიდან.

დ) მომსახურების გაწევის ვადა – მომსახურების გაწევის ვადა განისაზღვროს შესაბამისი მომსახურების დაწყების თარიღიდან არა უმეტეს 4 (ოთხი) წლის ვადით.

ე) ავიაბილეთების საფასური

ავიაბილეთების ფასს ადგენს შპს „საქართველოს აეროპორტების გაერთიანება“ მიმართულებების მიხედვით.

ავიაბილეთების რეალიზაციას შპს „საქართველოს აეროპორტების გაერთიანების“ მიერ დადგენილი წესითა და პირობებით უზრუნველყოფს მიმწოდებელი.

ავიაბილეთების რეალიზაციით მიღებული თანხები გადახდილ უნდა იქნეს შპს „საქართველოს აეროპორტების გაერთიანებისთვის“ ან გაიქვითოს მიმწოდებლისთვის ყოველთვიურად გადასახდელ თანხებთან.

თუ მიმწოდებელი თბილისი-ბათუმი-თბილისის მიმართულებით ფრენას შეასრულებს 40-ზე მეტადგილიანი საჰაერო ხომალდით, 40 ადგილზე ზევით გაყიდული ბილეთების თანხები იქნება მიმწოდებლის საკუთრება, მათ შორის, ეს უკანასკნელი უფლებამოსილი იქნება, საკუთარი სურვილისამებრ განსაზღვროს 40 ადგილზე ზევით მგზავრობის საფასურიც. ამასთან, მიმწოდებელი მხოლოდ იმ შემთხვევაშია უფლებამოსილი, გაყიდოს მისი კუთვნილი ბილეთები მის მიერვე დადგენილ ფასად, თუ სრულად არის რეალიზებული შპს „საქართველოს აეროპორტების გაერთიანების“ ბილეთები შესაბამის ფრენაზე.

ვ) მიმწოდებელი – მიმწოდებელი შეიძლება იყოს საჰაერო გადაყვანა-გადაზიდვის მოწმობის მქონე რეზიდენტი ან არარეზიდენტი პირი.


4. ხელშეკრულების შესაბამისად, მიმწოდებლისთვის ასანაზღაურებელი მომსახურების საფასურის ნაწილი დაიფარება ავიაბილეთების რეალიზაციით მიღებული შემოსავლით, ხოლო დანარჩენი თანხის დაფინანსება უზრუნველყოს საქართველოს ეკონომიკისა და მდგრადი განვითარების სამინისტრომ, შპს „საქართველოს აეროპორტების გაერთიანებისთვის“ ყოველთვიურად თანხის გამოყოფის გზით, შესაბამის თვეზე მიმწოდებელთან გაფორმებული მიღება-ჩაბარების აქტის

საფუძველზე.

5. ამ განკარგულების მე-4 პუნქტის მიზნებისთვის, შესაბამის თვეებზე დადგენილი მოსალოდნელი ფრენების განრიგის გათვალისწინებით, საჭირო ფულადი სახსრების უზრუნველყოფა დაევალოს საქართველოს ეკონომიკისა და მდგრადი განვითარების სამინისტროს, „საქართველოს სახელმწიფო ბიუჯეტის შესახებ“ შესაბამისი წლის საქართველოს კანონით გამოყოფილი ასიგნებების ფარგლებში.

6. საქართველოს ეკონომიკისა და მდგრადი განვითარების სამინისტრომ, ამ განკარგულების შესრულების მიზნით, უზრუნველყოს შესაბამისი ღონისძიებების გატარება.

პრემიერ-მინისტრი



გიორგი კვირიკაშვილი